



28. maj 2013

Inatsisartut Suleriaasianni § 37 naapertorlugu Naalackersuisunut apeqquq imaattoq matumuuna saqqummiuppara:

Risskovimi tarnimikkut napparsimasunut immikkoortortaarfik tusagassiutitigut isornartorsiorneqaqattaareersorlu februarip qaammataani sumiiffimmi pissutsit misissorneqalerput. Maannakkullu nassuiaat saqqummiunneqarsimalerpoq.

- 1) Naalackersuisut nassuiaat ilisimanerlugu?
- 2) Naalackersuisut iliuseqarnissaannut nassuiaat arlaatigut tunngavissiisimanerluni?
- 3) Naalackersuisut eqqarsaatiginerlugu nassuiaatip (imaluunniit taassuma ilaata kalaallit uninngavianut tunngasup: Immikkoortoq R3-mut tunngasup) nutsertinnissaa Inatsisartunullu ilaasortanut agguaallugu?

(Inatsisartunut ilaasortaq Jens B. Frederiksen, Demokraatit)

Tunngavilersuut

Paarnaarussat qimaasimanerinek isertuussineq, sulisut tilligarsimanerannik unnerluussinerit aamma immikkoortortaarfiup nakorsaataataanik atuinerit, sulisut napparsimallutik uninngasunut siorasaarisarsimanerat persuttaasarsimanerallu pillugit unnerluussinerit, napparsimasunik pinngitsaaliinermut malittarisassat unioqqutinneqaqattaarsimasut ... tamakkuupput Århus Universitetshospitalip Risskovimi tarnikkut napparsimasunut immikkoortortaarfiani pissutsit Danmarkimi aviisit ullormut saqqummersartup allaaserisimasaasa ilaat ukiup affaata ingerlanerani.

Oqaluttuat isornartorsiuisut kinguneranik pisortat sumiiffimmi pissutsinik misissuititsipput. Misissuineq naammassineqarsimalerpoq nassuiaasiortoqarlunilu.

Misissuineq Danmarkimiinnaq soqutigineqanngilaq aammali nunami maani. Pissutaavoq Århus Universitetshospitalip Risskovimi tarnikkut napparsimasunut immikkoortortaarfiaata immikkoortumik immikkoortortaarnera – R3-mik – Kalaallit Nunaanneersunik tarnimikkut napparsimasunik tiguisartog; ingammik napparsimasunik, inoqatiminnut ulorianartuliorlutik pinerlussimasunik taamaattumillu eqqarsartaatsimikkut misissorneqartussanik imaluunniit tarnimikkut katsorsagassanngorlugit pineqaatissinneqarsimasunik. Napparsimasunut taakkununnga akisussaavoq Kalaallit Nunaanni Namminersorlutik Oqartussat, Århus Universitetshospitalianik/Region Midtjyllandimik akiliilluni inissanik 18-nik atuinissaq pillugu isumaqatigiissuteqarsimat.

Apeqqutit akeqquneqarput tigusinermiit ullut sulliviit naliginnaasut qulit qaangiutsinnagit.